

光緒辛巳年重修

惠州府志

士

惠郡城北文昌宮藏板

惠州府志卷二十三

藝文一

到惠州謝表

蘇軾

先奉告命落兩職追一官以承議郎知英州軍州事續奉告命責授臣甯遠軍節度副使惠州安置已於今月二日到惠州參訖者仁聖曲全本欲畀之民社羣言交擊必將置之死亡尙荷寬恩止投荒服臣軾中謝伏念臣性資褊淺學術荒唐但信不移之愚遂成難赦之咎迹其狂妄久合誅夷方尙口乃窮之時蓋擢髮莫數其罪豈謂天幸得存此生此蓋伏遇皇帝陛下以大有爲之資行不忍入之政湯網開其三面舜干舞于兩階念臣奉事有年少加憐

愚知臣老死無日不足誅鋤頒示德音許全餘息故使虺
虺之馬猶獲蓋帷穀觶之牛得免刀凡臣敢不服膺嚴訓
託命至仁洗心自新沒齒無怨但以瘴癘之地魑魅爲鄰
衰疾交攻無復首邱之望精誠未泯空餘結草之忠臣無
任云云

省愆賦

宋進士唐庚

唐子謫居嶺表旣已半載杜門時省愆而慨曰身耶心耶孰陷吾於罪乎吾將求之身則身非我有四大所會地水火風誰爲之宰吾將求之心則心不在內復不在外不在中間是將安在晝夜以思寢食皆廢骨爲之出髮爲之改夢有告予曰甚哉子之蔽也罪性本空念念滅壞反復尋繹祇益咎悔道逢臭腐何足盼睐玩味不已適足自穢淨是妄而沉垢穀猶無而引稗譬之身體本自安泰或作病想便若嬰瘵識此病之誰受尙何施於砭艾譬之手足伸縮無碍忽作縛想舉動輒絀悟此縛之無實卽無繩而可解方聳聽于妙語失胸中之結塊若春動而冰泮若秋至

而葉敗回視無始以來幾千萬世所作罪業悉消散而無遺矣豈獨今之所以流落顛沛者哉覺而思之曰噫此殆維摩詰也攬衣而起正冠束帶稽首西望作禮而退

易庵記

宋唐庚

客問陶隱居吾欲注周易本草孰先隱居曰易居先客曰何也隱居曰注易誤猶不殺人注本草誤則有不得其死者矣世以隱居爲知言與吾之說大異蓋六經者君本之致治也漢時決疑獄斷國論引經術茲豈細故而易言哉本草所以辨物六經所以辨道道者物之所以生萬物者人之所以資以爲生一物之誤猶不及其餘道術一誤則無復孑遺矣前世儒臣引經誤國其禍至於伏屍百萬流血千里本草之誤豈至是哉注本草誤其禍疾而小注六經誤其禍遲而大隱居注本草矣故知本草之爲難而未嘗注經故不知經尤爲難而不可率易如此世以不服藥

爲中醫此言雖小可以喻大吾用易不審陷難幾死今幸
閑廢方且據菴熟讀而深思之復書此二本其一以自警
其一以寄二子焉

羅浮賦

宋 李南仲 禎陽

羅浮二山東西相聯通句曲之洞號朱明之天連延大江
之外崛起滄溟之壖乃百粵羣山之祖與南嶽而齊肩鐵
橋鎖乎絕頂石樓峙乎半嶺登覽遐極眇睇芊綿爾其周
迴五百七十二里森列四百三十三峰迴谿峻谷巖嶮崆
峴藻石璀璨瀑水玲瓏山出玳瑁竹茂龍葱羣雀五色靈
藥千叢寂寞兮丹砂遺電岌業兮瑤臺隱空懸厓斗折徑
路難通祥雲瑞霧晝夕朦朧時有斲幘羽服野人山翁忽
去倏來不知其蹤謂長生而久視亦往往寓乎其中時有
萬舶乘風不知西東瞻我峻極烟光蒙茸洞谷昏黑開乾
闢坤怒風叫號轟騰四門恍徐而內隱隱若萬兵之屯呼

吸號召鬼神湊奔徐而萬籟息朝霞暎日月晃耀氣象始
溫又或五夜蕭森樂池奏音彷彿仙籟彈絲擊金疑有雲
和之瑟空桑之琴青谷闕邃列仙下臨聚會靈族朋來盍
簪列席環坐開廓冲襟疎楹廣庭寶除翠林海桃霞漿左
右酬酢樂真言之恬淡憫世網之浮沉倏然往來不繼以
淫瞬息萬里敢颯馭之駸駸變化倏忽孰能究尋其上則
有惟金三品梗枏杞梓翡翠羽毛虎豹犀兕竹箭丹砂絺
纈絲枲珍角稔桶元龜象齒石密山焦黃精白芷蛾眉龍
骨桂香桐子先供賞以充庭何九州之敢擬真足以燦上
國之文章增皇家之盛美矧夫當祝融之宅位贊真主以
乘離雲行甫施產英孕奇其在國家有大禱祈驛使奔走

帝誠肅祇投金龍與玉版指道路以交馳將事之夕明靈
鑒斯乃至翔鸞舞鶴繞殿紫芝仙壇祭訖宣室受釐萬有
景福允王保之帝子王孫慶流本支獻南山之壽歌天保
之詩與夫他山頽壁徒當乎四達之達至飾別館止可事
乎遊嬉於功業兮何補於造化兮何裨豈比增高福地薦
美天基鞏固四極鎮安外彝巍巍隆隆無騫無虧宸毫秘
軸文采葳蕤瑞牒顯著又奚論乎真區之遠而

羅浮銘

梁廣州蕭譽

刺史

神哉蓬島合影羅岑南濱溟渤西負桂林龍嶼斜峙牛嶺
旁升形高華霍德邁衡岷橫天起巘插雲生襲修崖蔽景
孤峰鳳立所謂曜真仙靈攸集鮑靚栖偃葛洪餌丹梁盧
王佐控鶴軒鸞翠袍掛日朱霞冒冠寶文可佩冰玉宜餐
羣生浮瞬隙電盈輝枝葉禮義黥劓是非無因獨往山阿
采薇吐吸冲氣卷服雲衣亡他利己骨損身跳至人齊物
中還蘊妙灰心守一形枯道要史吹姬笙稽琴阮嘯桃出
李傍李生桃側無俟相因李僵桃食桃李雖榮終無久施
不摧松桂歲寒表色甘惟一味安止容膝神以動疲驕隨
滿溢溢滿則歆淳真志畢積想幽人羨茲貞吉敢刻名山

勒銘斯實

思無邪齋銘

蘇軾

東坡居士問法於子由子由報以佛語曰本覺必
明無明明覺居士欣然有得於孔子之言曰詩三
百一言以蔽之曰思無邪夫有思皆邪也無思則
土木也吾何自得道其惟有思而無所思乎於是
幅巾危坐終日不言明目直視而無所見攝心正
念而無所覺於是得道乃名其齋曰思無邪而銘
之曰

大患緣有身無身則無病廓然自圓明鏡鏡非我鏡如以
水洗水二水同一淨浩然天地間惟我獨也正

思無邪齋贊

蘇軾

飲食之精草木之華集我丹田我丹所家我丹伊何鉛汞
丹砂客主相守如巢養鴉培以戊己耕以赤蛇化以丙丁
滋以河車乃根乃株乃實乃華晝煉於日赫然丹霞夜浴
於月浩然素葩金丹自成曰思無邪

偃松屏贊

蘇軾

余爲中山守始食北岳松膏爲天下冠其木理堅
密瘠而不瘁洵植物之英烈也謫居羅浮山下地
暖多松而不識霜雪如高才勝人生紈綺家與孤
臣孽子有間矣土踐憂患安知非福幼子過從我
南來畫寒松偃蓋爲護首小屏爲之贊曰

燕南趙北大茂之麓天僵雪峰地裂冰谷凜然孤清不能
無生生此偉奇北方之精蒼皮玉骨礲礲齧齧方春不知
沍寒秀發孺子介剛從我炎荒霜中之英以洗我瘴

羅浮圖贊

宋陳堯佐

羅浮山惠州之望也按本經云山高三千六百丈
周廻五百二十七里然羅山一山也浮山卽蓬萊
之別島也堯時洪水浮至依羅山而止故有羅浮
之號焉又曰第七洞天卽此一山也戊戌冬僕出
官潮陽庚子春權牧茲郡公餘命駕山下覩二巘
之異躋幽巖步邃谷累日彌夕愛之忘返乃召畫
工相與立山之陽審望詳視卽而圖之旣成携以
歸凡見之者雖草野漁耒之子必曰此羅浮山也
一無殊焉噫是亦得其真矣雖不能流泉出雲鳴
鹿嘯虎至於觀寺之隱見聚落之向背左右遠邇

亦梗概焉惜其委之海隅卓爾天外倘好事者有
見其亦庶乎

贊曰惟墨之妙惟山之肖豈曰筆精是亦心照白雲未封
清名空耀嗟乎翠岑委此遐徼